

- केन्द्रीय पर्यावरण अर वन मंत्री भूपेन्द्र यादव अरावली री पहाड़ियां रा हलका मांय खुदाई ऊं जुड़ी खबरां माथे जनता ऊं भ्रम मांय नी रेहवण री अरज कीनी।
- मुख्यमंत्री भजनलाल शर्मा राजस्थान ने फिल्मां री शूटिंग री पसंदीदा ठौड़ बणावण सारू नुवी फिल्म पर्यटन प्रोत्साहन नीति जारी कीनी।
- नशा मुक्त भारत अभियान ऊं 21 करोड़ ऊं बत्ता लोगां ने जोड़ी ज्या-प्रदेश मांय 10 नुवा नशा मुक्ति केन्द्र खोल्या जावेला।
- प्रभु यीशू रो जन्मदिन क्रिसमस काल-बड़ो दिन मनावण सारू खास तैयारियां।

000

केन्द्रीय पर्यावरण, वन अर जलवायु परिवर्तन मंत्री भूपेन्द्र यादव कह्यो है के कुछ लोग अरावली री झूगरियां रा बारा मांय सुप्रीम कोर्ट रा फैसला ऊं जुड़ी गलत जाणकारियां फैला रह्या है। आकाशवाणी सागे बातचीत करता थकां श्री यादव जनता ऊं भ्रम मांय नी रेहवण बाबत् कह्यो।

000

वे कह्यो के अदालत रा फैसला री गलत व्याख्या कर र इण ने सियासी हथियार रा तौर ऊं इस्तेमाल कर्यो जा रह्यो है। वे साफ कीनो के सुप्रीम कोर्ट रो फैसलो अरावली हलका मांय गैर-कानूनी खुदाई माथे रोक लगावण रो है। केन्द्रीय मंत्री अरावली ग्रीन वॉल पहल रा बारा मांय कह्यो के इण रा तैत हलका री बंजर जमीं मांय मोटी तादाद मांय पौधा रोप्या जा रह्या है।

000

राज्य री मौजूदा सरकार रा कामकाज रा दो साल पूरा व्हेवण रा सिलसिला मांय राख्या जा रह्या आयोजनां रा तैत आज सीकर जिला रा रामगढ़ शेखावाटी मांय खास कार्यक्रम राख्यो ज्यो। इण मांय मुख्यमंत्री भजनलाल शर्मा सीकर अर झुंझुनू जिलां ने 539 करोड़ रुपया रा खर्च ऊं करायी ज्या विकास रा कामां री सौगात दीनी। कार्यक्रम मांय नगरीय विकास अर आवासन मंत्री झाबर सिंह खर्मा अर जनता रा दूजा नुमाइन्दा ई शामिल व्ह्या। ई मौके राख्यो ज्यो जनसभा मांय मुख्यमंत्री कह्यो के सुशासन सारू जनता रा प्रति जवाबदेही जरूरी है। वे कह्यो के राज्य सरकार पूरी जवाबदेही ऊं काम कर रही है अर दो साल रा कामकाज रो हिसाब लोगां बीचे जा र दियो जा रह्यो है।

000

मुख्यमंत्री आज राजस्थान फिल्म पर्यटन प्रोत्साहन नीति-2025 जारी कीनी। इण ने राजस्थान ने देशी अर परदेसी सिनेमा री शूटिंग री पसंदीदा ठौड़ बणावण री दिशा मांय खास कदम मान्यो जा रह्यो है। ई मौके श्री शर्मा कह्यो के आ नीति राज्य ने फिल्मां री खास ठौड़ रा तौर ऊं सामी लावेला, जिण ऊं नौजवानां ने नौकरी-धंधा अर कौशल विकास रा मौका मिलेला। मुख्यमंत्री कह्यो के नुवी नीति मांय फिल्मां बणावण वाळां ने सब्सिडी अर बधावो देवण सागे काम-धंधो करणो आसान बणावण बाबत् ई केई प्रावधान करी ज्या है।

उपमुख्यमंत्री दीया कुमारी बतायो के राज्य मांय ज्यां फीचर फिल्मां, वेब सीरीज, टी.वी. सीरियल अर डॉक्यूमेंट्री री शूटिंग करी जावेला, वां माथे खर्च रा 30 फीसदी ताई छूट दी जावेला।

000

पैली वाळा प्रधानमंत्री अटल बिहारी वाजपेयी री जयंती काल सुशासन दिवस रा तौर ऊं मणायी जावेला। सुशासन दिवस री पैली वाळी सांझ गृह मंत्री अमित शाह आज हरियाणा रा पंचकुला मांय राख्या जा रह्या न्यारा-न्यारा कार्यक्रम मांय शामिल व्हे रह्या है, ज्यां मांय अटल बिहारी वाजपेयी री मूरत रो अनावरण कर्यो जा रहयो है अर वां री ज़िन्दगी माथे आधारित प्रदर्शनी लगायी ज्यी है। प्रधानमंत्री नरेन्द्र मोदी रो काल लखनऊ मांय राख्या जावण वाळा खास आयोजन मांय शामिल व्हेवण अर राष्ट्र प्रेरणा स्थल रो उद्घाटन करण रो कार्यक्रम है। सुशासन दिवस रे मौके काल जयपुर रा कॉमर्स कॉलेज मांय रोजगार मेळो लगायो जावेला।

000

विश्वविद्यालयां रा कुलाधिपति हरिभाऊ बागडे विश्वविद्यालयां ने गुणवत्ता वाळी सीख देवण रा केन्द्र बणावण री ज़रूरत माथे जोर दीनो है। श्री बागडे आज बीकानेर रा महाराजा गंगासिंह विश्वविद्यालय रा दीक्षांत समारोह मांय बोल रह्या हा। वे विद्यार्थियां ऊं देश अर समाज ने सीधो फायदो पूगावण वाळा मुद्दां माथे शोध करण बाबत क्हयो।

000

नशा मुक्त भारत अभियान ऊं हाल ताई 15 करोड़ ऊं बत्ता नौजवानां अर 6 करोड़ ऊं बत्ती महिलावां ने जोडी ज्या है। केन्द्रीय सामाजिक न्याय अर अधिकारिता मंत्री डॉ. वीरेन्द्र कुमार आज नई दिल्ली मांय आ जाणकारी दीनी। प्रदेश मांय ई चालू माली साल मांय दस नुवा नशा मुक्ति केन्द्र खोल्या जावेला। सामाजिक न्याय अर अधिकारिता मंत्री अविनाश गहलोत आज झुंझुनू मांय खबरनवीसां ने आ जाणकारी दीनी। वे क्हयो के सरकार पूरा मन ऊं नशा रे खिलाफ काम कर रही है।

000

केंद्रीय मंत्रिमंडल दिल्ली मेट्रो ने और बधावण रा पांचवां दौर ने मंजूरी दे दीनी है। ई काम माथे 12 हजार करोड़ रुपया ऊं बत्ती रकम खर्च व्हेला। मंत्रिमंडल री मीटिंग पाछे सूचना अर प्रसारण मंत्री अश्विनी वैष्णव नई दिल्ली मांय खबरनवीसां ने आ जाणकारी दीनी। वे बतायो के ई दौर रा काम पाछे दिल्ली मांय मेट्रो रेल रो नेटवर्क 400 किलोमीटर ने पार कर जावेला।

000

राष्ट्रीय उपभोक्ता दिवस रे मौके आज राज्य मांय केई कार्यक्रम राख्यी ज्या। डीग मांय जिला कलेक्टर उत्सव कौशल ग्राहकां रा हक ऊं जुड़्या राज्य सरकार रा नुवा दिशा-निर्देशां रा बारा मांय जाणकारी दीनी। पाली अर सवाईमाधोपुर मांय ई रसद विभाग री ओर ऊं डिजिटल न्याय रा मुद्दा माथे संगोष्ठी राख्यी ज्यी, जिण मांय ग्राहकां रा कानूनी हक रा बारा मांय बतायी ज्यो।

000

काल प्रभु यीशू मसीह रो जन्म दिन क्रिसमस मनायो जावेला। बड़ो दिन मनावण सारु गिरजाघरां मांय सोहवणी रोशनी करीजी है अर वां ने झांकियां ऊं सजायी ज्या है। काल न्यारा-न्यारा गिरजाघरां मांय खास प्रार्थना सभावां राख्यी जावेला। क्रिसमस ऊं पैली वाळी सिंज्यां आज केक अर चॉकलेटां री खूब बिक्री व्हे रही है। शॉपिंग मॉल्स सागे ई केई ठौड़ां क्रिसमस ट्री सजायी ज्या है अर सांता क्लॉज बच्चां ने उपहार दे रह्या है। राज्यपाल हरिभाऊ बागडे जनता ने क्रिसमस री शुभकामनावां दीनी है। बधाई संदेश मांय श्री बागडे ईसा मसीह ऊं सीख लेवण बाबत क्हयो।

000

भरतपुर मांय आज महाराजा सूरजमल स्मृति दिवस समारोह सरु व्ह्यो। जिला प्रशासन अर पर्यटन विभाग री ओर ऊं राख्या जा रह्या दो दिन रा ई समारोह रा पहला दिन आज लोहागढ़ किला मांय बच्चां सारु खास होड़ां राख्यी ज्यी अर किशोरी महल मांय रेत ऊं बणायी ज्यी कलाकृतियां-सेण्ड आर्ट री प्रदर्शनी लगायी ज्यी। विश्व प्रिय शास्त्री पार्क मांय चाल रही सांस्कृतिक संध्या मांय लोक कलाकार कार्यक्रम पेश कर रह्या है। काल शौर्य यात्रा निकाळी जावेला।

000

कोटा जिला रा चेचट मांय दिल्ली-मुंबई एक्सप्रेस-वे माथे एक कंटेनर रे कार माथे पड़ जावण ऊं व्हया हादसा रे कारण दो महिलावां री मौके ई मौत व्हे गयी। नागौर मांय अजमेर-बीकानेर हाईवे माथे थांवला कने आज तड़के एक कार पलट जावण ऊं दो जणां री मौत व्हे गयी अर छह जणां घणा जख्मी व्हे ग्या। जख्मी लोगां ने अजमेर रा सरकारी अस्पताल मांय भर्ती करायी ज्या है।

000

राज्य मांय पारा मांय उतार-चढ़ाव बीचे आज ठंड रो बत्तो असर महसूस कर्यो जा रह्यो है। बाड़मेर, जोधपुर अर बीकानेर समेत केई जिलां मांय दिन री बगत पारो 5 ऊं 7 डिग्री सेल्सियस तांई उतर्यो। 2 दशमलव 6 डिग्री सेल्सियस न्यूनतम तापमान सागे सीकर जिला रो फतेहपुर लारली रात सब ऊं ठण्डी ठौड़ रह्यो। नागौर मांय रात री बगत पारो 3 दशमलव 4 डिग्री सेल्सियस दर्ज करी ज्यो। बीकानेर जिला रा लूणकरणसर मांय न्यूनतम तापमान 5 दशमलव 4 डिग्री सेल्सियस नापी ज्यो। आज चूरू, झुंझुनूं, सवाईमाधोपुर, भरतपुर, श्रीगंगानगर अर हनुमानगढ़ समेत केई ठौड़ां धुंअर रही। मौसम केन्द्र जयपुर रे मुजब काल प्रदेश रा उतराद-आतूणी हलका मांय कोहरो व्हेवण रा आसार है।

000

राजस्थान नेत्रहीन सेवा संघ री ओर ऊं काल जयपुर मांय वर्ल्ड ब्लाइंड यूनियन रा नुवा चुणी ज्या अध्यक्ष संतोष कुमार रूंगटा रो मान कर्यो जावेला। ओ पहलो मौको है, जद भारत रो कोई जणो ई अंतर्राष्ट्रीय यूनियन रो मुखिया बण्यो है।

000

प्रधानमंत्री नरेन्द्र मोदी आकाशवाणी ऊँ हर महीना प्रसारित कर्या जावण वाळा खास कार्यक्रम मन की बात मांय 28 दिसम्बर दीतवार ने विचार बतावेला। आ ई कार्यक्रम री 129वीं कड़ी व्हेला। ई सारू आप ई मुफ्त नम्बर 1800-11-7800 माथे राय दे सको हो। ई सागे ई नरेन्द्र मोदी एप अर माय जीओवी ओपन फोरम रे ज़रिये ई 26 दिसम्बर तांई विचार भेज्या जा सके है।

000

आंध्र प्रदेश मांय श्री हरिकोटा रा सतीश धवन अंतरिक्ष केन्द्र ऊं आज अंतरिक्ष यान एल वी एम थ्री-एम सिक्स रे जरिए ब्लूबर्ड ब्लॉक-2 कामयाबी सागे छोड़ी ज्यो। ई पाछे वो कामयाबी सागे कक्षा मांय स्थापित व्हे ग्यो। साढ़े छह टन वजन रो ओ संचार उपग्रह भारत कानी ऊं छोड़ी ज्यो हाल तांई रो सब ऊं भारी उपग्रह है।

000